

आकाशवाणी जयपुर-अजमेर

प्रादेशिक समाचार

दिनांक 05.12.2024

समय: 18.45 बजे

- प्रदेश मांय जमीं हेटे पाणी रो लेवल बधावण सारु प्रवासियां री मदद ऊं 'कर्मभूमि से मातृभूमि' अभियान चलायो जावेला।
- राज्यपाल हरिभाऊ बागडे आयुर्वेद रा ज्ञान ने मौजूदा बगत रे अनुसार बणा र बत्ती ऊं बत्ती जनता ताई पूगावण बाबत कह्यो।
- राजस्थान हाईकोर्ट राज्य री दूजी सेवावां रा अहलकारां ने पदोन्नत कर र आईएस अहलकार बणावण रे खिलाफ दायर अर्जी खारिज कीनी।
- उप राष्ट्रीय पल्स पोलियो अभियान रा तैत प्रदेश रा 39 जिलां मांय 8 दिसम्बर ने बच्चां ने पोलियो ऊं बचाव री दवाई पाई जावेला।

000

प्रदेश मांय जमीं हेटे पाणी रो लेवल बधावण सारु प्रवासियां री मदद ऊं 'कर्मभूमि से मातृभूमि' अभियान चलायो जावेला। मुख्यमंत्री भजनलाल शर्मा आज नई दिल्ली मांय जल शक्ति मंत्री सी आर पाटिल अर मध्यप्रदेश रा मुख्यमंत्री मोहन लाल यादव सागे ई अभियान रा बारा मांय चर्चा कीनी। अभियान रा तैत मध्यप्रदेश, गुजरात अर बिहार मांय रह रह्या राज्य रा प्रवासियां री ओर ऊं 45 हजार गांवां मांय जमीं हेटे पाणी रो लेवल बधावण सारु नुवी रिचार्ज शाफ्ट्स बणायी जावेला।

000

राज्यपाल हरिभाऊ बागडे कह्यो है के आयुर्वेद रा ज्ञान ने मौजूदा बगत रा हिसाब ऊं बणा र इण री जाणकारी बत्ती ऊं बत्ती जनता ताई पूगावण बाबत कह्यो है। वे आज जोधपुर मांय राष्ट्रीय आयुर्वेद विश्वविद्यालय कानी ऊं 'आयुर्वेदिक औषधि मानकीकरण- चुनौतियां और समाधान' मुद्दा माथे राख्यी ज्यी अन्तर्राष्ट्रीय संगोष्ठी मांय बोल रह्या हा। राज्यपाल आयुर्वेदिक दवाइयां रा बारा मांय शोध अर अनुसंधान ने बधावो देवण सागे गंभीर बीमारियां रा ईलाज मांय आं ने काम लेवण रा परीक्षण बाबत ई काम करण सारु कह्यो। वे देशी दवाइयां ने बेचण री कारगर नीति बणावण माथे ई जोर देता थकां आं रा पेटेंट हासिल करण बाबत काम करण री जरूरत बतायी। राज्यपाल इण ऊं पैली विश्वविद्यालय मांय बण्या होम्योपैथी कॉलेज रो भवन ई जनता ने सूप्यो।

000

राज्य मांय मुख्यमंत्री भजनलाल शर्मा री अगुवाई वाळी सरकार रा कामकाज रो एक साल पूरो व्हेवण रे मौके 12 दिसम्बर ऊं भांत-भांत रा कार्यक्रम राख्या जावेला। आं री तैयारियां रो जायजो लेवण सारु आज डूंगरपुर रा जिला कलेक्टर अंकित कुमार सिंह अहलकारां सागे मीटिंग कर र जरूरी हुकम दीना। सलूमबर मांय जिला कलेक्टर जसमीत सिंह संधू न्यारा-न्यारा कार्यक्रमों रा बारा मांय अहलकारां सागे चर्चा कीनी। ई मौके राख्या जावण वाळा खास कार्यक्रमों मांय विकसित राजस्थान सारु दौड़, जिला स्तर री प्रदर्शनी, रोजगार विभाग कानी ऊं राख्या जावण वाळा कार्यक्रम अर किसान सम्मेलन शामिल है।

000

भारतीय अंतरिक्ष अनुसंधान संगठन आज श्रीहरिकोटा रा सतीश धवन अंतरिक्ष केंद्र ऊं प्रोबा-3 उपग्रह ले जावण वाळा पीएसएलवी-सी-59 प्रक्षेपण यान ने कामयाबी सागे छोड्यो। प्रक्षेपण यान श्रीहरिकोटा ऊं सिंज्यां चार बज र चार मिनट परां उड़ान भरी। इसरो री ओर ऊं सोशल मीडिया रे जरिये आ जाणकारी दीरीजी। प्रोबा-3 यूरोपीय अंतरिक्ष एजेंसी रो खास कार्यक्रम है, जिण रा तैत दो उपग्रह अंतरिक्ष मांय भेजी ज्या है। पीएसएलवी सी-59 उड़ान भरण रा 18 मिनट पाछे वां री तैय कक्षा मांय पूग ग्यो अर 545 किलोग्राम वजन रा दो उपग्रह धरती ऊं 600 किलोमीटर ऊंचा स्थापित कर दीना। अ दोन्यू उपग्रह सूरज रा बाहरी वातावरण रा बारा मांय खोजबीन करेला।

000

राजस्थान हाईकोर्ट आज आरएस रे अलावा राज्य सरकार री दूजी सेवावां रा अहलकारां ने आईएस अहलकार बणावण रे खिलाफ दायर अर्जी खारिज कर दीनी। अदालत अर्जी लगावण वाळा माथे पांच लाख रुपया रो जुर्मानो ई लगायी ज्यो। न्यायमूर्ति पंकज भंडारी अर न्यायमूर्ति शुभा मेहता री खंडपीठ राजस्थान प्रशासनिक सेवा परिषद् अर दूजां री अर्जी माथे सुणवाई करता थकां ओ हुकम दीनो। हाईकोर्ट रा ई फैसला ऊं गैर आरएस ऊं आईएस मांय तरक्की माथे करीब तीन साल पैली लगायी ज्यी रोक ई हट ग्यी है। ई मामला मांय सरकार री ओर ऊं पैरवी करण वाळा अतिरिक्त महाधिवक्ता विज्ञान शाह आकाशवाणी ने बतायो के अदालत राज्य सरकार री दूजी सेवावां रा अहलकारां ने ई आईएस अहलकार बणावण रा फैसला ने सही ठहरायो है।

000

उप राष्ट्रीय पल्स पोलियो अभियान रा तहत प्रदेश रा 39 जिलां मांय 8 दिसम्बर ने 5 साल ताई रा बच्चां ने पोलियो ऊं बचाव री दवाई पाई जावेला। स्वास्थ्य विभाग मांय टीकाकरण री परियोजना रा निदेशक डॉक्टर रघुराज सिंह आकाशवाणी ने बतायो के 87 लाख बच्चां ने पोलियो ऊं बचाव री दवाई पावणो तैय करी ज्यो है, ज्यीं सारू 46 हजार 887 बूथ बणायी ज्या है। वे बतायो के अभियान सारू 60 हजार पार्टियां लगायी जावेला। डॉ. रघुराज सिंह कह्यो के पोलियो री बीमारी ऊं बचाव सारू बच्चां ने आ दवाई पावणो जरूरी है।

000

शाहपुरा मांय 22 दिसम्बर ने राष्ट्रीय लोक अदालत लगायी जावेला, ज्यां मांय राजीनामा ऊं मामला निपटाय जावेला अर मुफ्त कानूनी राय दी जावेला। ई बारा मांय जनता ने जाणकारी देवण सारू फूलियाकलां तहसील मांय कार्यक्रम राख्यी ज्यो।¹

000

पाली जिला रा रानी मांय महिला अधिकारिता विभाग री ओर ऊं लैंगिक उत्पीड़न रे खिलाफ जाग जगावण रो कार्यक्रम राख्यी ज्यो। कार्यक्रम मांय महिलावां रे खिलाफ यौन उत्पीड़न रा बारा मांय खास जाणकारी दीरीजी अर साल 2013 मांय बणायी ज्या इण ऊं जुड़्या कानून रा बारा मांय बतायी ज्यो। कार्यक्रम मांय महिलावां अर टाबरियां सारू मुफ्त आरएससीआईटी कोर्स रा बारा मांय ई जाणकारी दीरीजी। ई कार्यक्रम रो खास मकसद महिलावां मांय वां रा हक रा बारा मांय जाग जगा र वां ने मजबूत बणावणो है।

000

पाकिस्तान ऊं आ र लम्बा बगत ऊं जोधपुर मांय रेहवास करण वाळां ने भारत री नागरिकता हासिल करण मांय आ रही परेशानियां आगी करण सारू जिला कलेक्टर ऑनलाइन पोर्टल बणायो है। ई पोर्टल रे मार्फत ऐंडा 129 जणां ने भारत री नागरिकता दिरावण री कार्यवाही करी जा रही है। ई पोर्टल रे मार्फत अर्जी देवण वाळां ने वां री अर्जी री स्थिति री ठा पड़ जावेला। जोधपुर मांय रह रह्या ऐंडा 402 जणां ने भारत री नागरिकता मिल ग्यी है, जदके 60 जणां ने इण री मंजूरी रा कागजात जारी कर दिया ज्या है। नागरिकता संशोधन कानून 2019 पाछे मिली 129 अर्जियां विचार सारू पोर्टल माथे राख्यी ज्यी है।

000

आज विश्व मृदा दिवस है। इण रो ई साल रो मुद्दो है— **केअरिंग फॉर सॉइल : मेजर, मॉनिटरिंग, मैनेज** है। ई मौके प्रदेश मांय ई किसानां ने जाणकारी देवण सारु न्यारा-न्यारा कार्यक्रम राख्यी ज्या। जोधपुर मांय कृषि अधिकारी किसानां ने मिट्टी री उर्वरता रा बारा मांय जाणकारी दीनी। पाली मांय ई मौके कृषि भवन री नुवी मिट्टी परीक्षण प्रयोगशाला मांय किसान मिट्टी रा नमूना दीना। आं नमूनां री वैज्ञानिक तरीका ऊं जांच कर र किसानां ने वां री रपट दी जावेला। परीक्षण प्रयोगशाला रा वैज्ञानिक चंद्रपाल सिंह राणावत किसानां ऊं टेम सर माटी री जाँच करावण बाबत कह्यो। दौसा रा धनतूरी गाँव मांय किसान संगोष्ठी राख्यी ज्यी, जिण मांय किसानां ने मृदा स्वास्थ्य कार्ड दिया ज्या अर खाद काम लेवण रा बारा मांय जाणकारी दीरीजी। **जोधपुर ग्रामीण** जिला मांय ई कृषि विभाग रा अहलकार काश्तकारां ने मिट्टी रा स्वास्थ्य रा बारा मांय जाणकारी दीनी।

000

गृह रक्षा स्थापना सप्ताह रा तैत आज सवाईमाधोपुर मांय होमगार्ड स्वयं सेवक जन चेतना वाहन रैली निकाली। ई मौके कम्पनी कमाण्डर करनाराम बतायो के जनता मांय गृह रक्षा विभाग रा काम, वां री सेवा अर महत्त्व रा प्रति जाग जगावण रा मकसद ऊं निकाली ज्यी ई रैली रे मार्फत यातायात सुरक्षा, पर्यावरण री हिफाजत अर आपदा प्रबंधन रा बारा मांय जनता ने जाणकारी दीरीजी।

000

माध्यमिक शिक्षा निदेशालय, अजमेर राज्य री सरकारी स्कूलां री 9 वीं कक्षा मांय पढ़बा वाली टारियां ने साइकिल देवण रो कार्यक्रम अब 14 दिसम्बर री बजाय दो दिन पैली 12 दिसम्बर ने राख्यो जावेला। साइकिलां देवण सारु 12 दिसम्बर ने न्यारा जिलां मांय वर्चुअल तरीका ऊं कार्यक्रम राख्या जावेला। चालू शिक्षा सत्र मांय राज्य री सवा तीन लाख टाबरियां साइकिल लेवण री पात्र है ज्यां मांय ऊं सवा लाख टाबरियां ने वर्चुअल कार्यक्रम मांय साइकिलां दी जावेला।

000

भरतपुर जिला री 60 ग्राम पंचायतां मांय काल **हरा भरा पोखर अभियान** सरु कर्यो जावेला। जिला परिषद रा मुख्य कार्यकारी अधिकारी मृदुल सिंह बतायो के ई अभियान रा तैत आं ग्राम पंचायतां मांय ठोस अर तरल कचरा प्रबंधन अर पोखर ने सोहवणा बणावण रा काम कराया जावेला। वे बतायो के आं हलकां मांय जमीं माथे गैर कानूनी कब्जा हटावण सारु जनता रा नुमाइंदा अर आमजन री भागीदारी तैय करी जावेला।

0000